

5. maj 2004

UPA 2004/29

**Avatangiisit innarlitsaaliorneqarnissaannik Inatsisartut peqqussutaata
allanngortinneqarnera pillugu Inatsisartut peqqussutissaattut siunnersuut**

pillugu

Inatsisartut Eqqissisimatitsinermut Avatangiisinullu Ataatsimiititaliaata

ISUMALIUTISSIISSUTAA

**aalajangiiffigisassatut siunnersuutip aappaassaaneerpeqarneranut
saqqummiunneqartoq**

Ataatsimiititaliaaq suliarinninnermini ukuninnga inuttaqarpoq:

Inatsisartunut ilaasortaq Aqqaluk Lyngø, Inuit Ataqatigiit, siulittaasoq
Inatsisartunut ilaasortaq Isak Davidsen, Siumut, Siulittaasup tullia
Inatsisartunut ilaasortaq Otto Jeremiassen, Siumut
Inatsisartunut ilaasortaq Jakob Sivertsen, Atassut
Inatsisartunut ilaasortaq Palle Christiansen, Demokraatit

Inatsisartut Eqqissisimatitsinermut Avatangiisinullu Ataatsimiititaliaata ulloq 21.
april 2004 UPA 2004-mi siullermeerneqarmat siunnersuut nassuiaatai ilanngullugit
misissuataarppaa.

Tusarniaanermi akissutisiat

Siunnersuutip matuma ataatsimiititaliami suliarineqarnissaanut atugassatut tusarniaanermi akissutisiat assilineri pissarsiarisineqarsimapput.

Siunnersuut manna ulloq 27. februar 2004 akissuteqarnissamut killiliullugu ulloq 3. februar 2004 tusarniaassutitalugu nassiunneqarsimasoq Naalakkersuisut paasisutissiissutigaa. Tusarniaanermi minnerpaamik sapatit akunnerinik sisamanik akissuteqarnissamut periarfissiisarnissap eqquutinneqarnissaa Eqqissisimatitsinermut Avatangiisinullu Ataatsimiititaliap erseqqissarumavaa.

Siunnersuut pillugu

Eqqissisimatitsinermut Avatangiisinullu Ataatsimiititaliap ataatsimut isigalugu Inatsisartut siullermeerinninneranni allannguutissatut siunnersuutip naalakkersuinikkut siamasissumik isumaqatigineqarnera innersuussutigissavaa.

Naalakkersuisunut ilaasortaq saqqummiussissummini avatangiisinut inatsisip tunngaviata tamarmiusup pilertortumik iluarsartuunneqartariaqalenera pillugu erseqqissaasoq Eqqissisimatitsinermut Avatangiisinullu Ataatsimiititaliap maluginiarpaa. Qaqugu iluarsartuussineq taanna naammassissallugu naatsorsuutiginnerlugu kiisalu iluarsartuussinerup qanoq aningaasatigut kinguneqaateqarnissaa naatsorsuutiginnerlugu Naalakkersuini ilaasortaq Inatsisartunut nassuiaateqassasoq Ataatsimiititaliap naatsorsuutigaa.

Avatangiisinut tunngatillugu Namminersornerullutik Oqartussat nunanut allanut pisussaaffii

Kalaallit Nunaata avatangiisinut tunngatillugu nunat tamalaat akornanni isumaqatigiissutinut attuumassuteqartunut ilaatinneqartarnera naalakkersuinikkut pitsaasumik siamasissumillu tunngavilimmik Namminersornerullutik Oqartussani ileqqujuarpoq. Taamaalilluni Naaminersornerullutik Oqartussat nunanut tamalaanut tunngatillugu akisussaaffimmik tigusisarput.

Avatangiisit pillugit nunat tamalaat akornanni Namminersornerullutik Oqartussat pisussaaffiisa piviusunngortinneqarnissaannut Namminersornerullutik Oqartussanit kinguaattooruteqartut ataatsimiititaliap maluginiarpaa.

Avatangiisit pillugit nunat tamalaat akornanni isumaqatigiissutit Namminersornerullutik Oqartussanut atortuutinneqartut pillugit Avatangiisinut Naalakkersuisup Eqqissisimatitsinermut Avatangiisinullu Ataatsimiititaliamut nassuiaatigineqarnissaa ataatsimiititaliap kissaatigaa, avatangiisinullu tunngatillugu pisussaaffiit atortuulersinneqartut tamarmik Namminersornerullutik Oqartussanit qanoq qaqugulu eqquutinneqarnissat aammattaaq eqqarsaatigalugu.

Taama oqaaseqarluni Inatsisartut Eqqissisimatitsinermut Avatangiisinullu Ataatsimiititaliaata isumaqatigiittup siunnersuut Inatsisartunut

aappassaaniigassanngortippaa, inassutigalugulu siunnersuut iluserisamisut
akuersisutigineqassasoq.

Aqqaluk Lynge (IA)
Siulittaasoq

Isak Davidsen (S)
Siulittaasup tullia

Otto Jeremiassen (S)

Jakob Sivertsen (A)

Palle Christiansen (D)